

MADUZE NJE ABANTU BAKWAJIKI JOE SEBEZOHLALA NGOKUPHEPHA NOKUNETHEZEKA

UNgqongqoshe Wezokuhlaliswa Kwabantu kanye Nemisebenzi Yomphakathi, uMnu. Ravi Pillay, usanda kuhambela indawo lapho kuzokwakhiwa izindlu ezizodla imali elinganiselwa ku-R441 million ezakhelwa umphakathi wakwaJoe, okuyindawo esenyakatho yedolobha uMgungundlovu, egudle umqwaqo onguthelawayeka u-N3.

Lo mphakathi wakwaJoe uhlala ezindlini ezakhiwe ngakhalibhothi kanye nothayela. Iningi labahlali bakule ndawo abantu abasuke le emakhaya ngenxa yohaqwa ububha base befudukela lapha edolobheni ukuzofuna umsebenzi.

Ngenhloso yokuphucula lesi simo salaba bahlali bakuWadi 33 ngaphansi kukaMasipala uMsunduzi, uMnyango Wezokuhlaliswa Kwabantu KwaZulu-Natali ugunyaze ukwakhiwa kwezindlu ezinamakamelo amabili eziyi- 164 ezizokashiselwa imindeni eholi kusukela kuma-R800 kuya ku-R3500. Emva kokuhanjelwa kwale ndawo, ithimba elalilholwa nguNgqongqoshe u-Ravi Pillay, uNgqongqoshe

Wezokwenganyelwa Komasipala kanye Nezindaba Zomdabu uNkz. Nomusa Dube-Ncube, izikhulu eziphezulu zikaMasipala uMsunduzi kanye nezikaMasipala weSifunda uMgungundlovu, kwabe sekuqinisekiswa ukuthi ukwakhiwa kwalezi zindlu kuzophothulwa ngonyaka wezi-2020.

I-Motheo Construction okuyinkontilaki eyakhayo seyiqalile ivula isiza kanye nemigudu yamapayipi amanzi.

Kumanje abantu abangama-20 abadla imbuya ngothi abangabahlali bakwaJoe sebethole umsebenzi kuwona lo mklamo, benza imisebenzi ebandakanya imisebenzi engadingi makhono enhlonhlobo kanye nokuba ngonogada.

Ukumenyezelwa kwalezi zindaba ezimnandi kanye nokwethulwa kwenkontilaki ezokwenza umsebenzi kuwuthokozise kakhulu umphakathi, kwaqhuma umkikizo nenhloko yenjabulo, njengoba ubuphume ngobuningi ukuzozibonela ngamehlo kuqala umklamo ozowulethela ukuphepha nokunethezeka emva kweminyaka eminingi yenhlupheko.



UDalisu Ngubo oyi- Civil engineering technician elandisa USekela Meyi WaseMsunduzi uThabani Zuma, iMeyi yeSifunda uMgungundlovu uThobekile Maphumulo, uNgqongqoshe woMnyango Owengamele Omasipala kanye Nezindaba Zomdabu uNomusa Dube-Ncube kanye noNgqongqoshe Wezokuhlaliswa kwabantu kanye Nezemisebenzi Yomphakathi uMnu. Ravi Pillay ngokuqhubekayo maqondana nomklamo wokwakhiwa kwezindlu kwaJoe ngesikhiathi bevakashela indawo yesakhiwo